

दूरदर्शन पर हिंदी ते अंग्रेजी च सम्बोधन दे प्रसारण दे मगरा एहदा इलाकाई भाशाएं च प्रसारण दूरदर्शन दे क्षेत्रीय चैनलें पर कीता जाहगा। आकाशवाणी आसेआ राष्ट्रपति हुंदे सम्बोधन दा इलाकाई भाशाएं च प्रसारण अज्ज रातीं साड्डे 9 बजे थमां कीता जाहगा।

<><><><><><>

Security I Day

कल मनाए जाने आले आजादी दे ध्याड़े आले समारोह शा पैहले समूलचे जम्मू-कश्मीर च सुरक्षा बवस्था निगार करी दिती गेदी ऐ। खासतौर पर कब्जा रेखा ते अंतराष्ट्री बन्ने पर गश्त ते निगरानी बधाई दिती गेई ऐ। जम्मू च आजादी आले ध्याड़े दा मुख् समारोह मौलाना आज़ाद स्टेडियम च होग- जित्थे उपमुख्मंत्री सुरिंदर चौधरी होर तिरंगा झंडा चाढ़डन ते सलामी लैडन। तोंआई श्रीनगर दे बख्शी स्टेडियम च आयोजित होने आले मुख् समारोह दी अध्यक्षता मुख्मंत्री उमर अब्दुल्ला होर करडन। इसै चाली मंत्री स्कीना इतू अनंतनाग च-मंत्री जावेद अहमद राणा पुंछ च-मंत्री जावेद अहमद डार बारामुला च ते मंत्री सतीश शर्मा कठुआ च जिला स्तर दे समारोहें दी अगुआई करडन।

<><><><><><>

Public Places Illuminated

आजादी आले ध्याड़े दे जश्न कोला पैहले समूलचे जम्मू-कश्मीर च महत्वपूर्ण सार्वजनिक थाहरें गी तिरंगे दे रंगें कन्नै रोशन कीता गेदा ऐ। जम्मू नगर-निगम ने तवी पुलें सनें जम्मू शैहरा च इस बारे इक बशेश अभियान चलाया। इक बक्खरी पैहलकदमी दे तैहत आकाशवाणी जम्मू दी इमारत गी बी तिरंगे रंगें कन्नै रोशन कीता गेदा ऐ। तोंआई पुंछ च देशभक्ति ते सांस्कृतिक प्रस्तुतिएं आला इक संगीतमय तिरंगा Concert आयोजित कीता गेआ....

<><><><><><>

Partition Day

1947 च होई दी मुल्ख दी बंडड दे सरबंघै च अज्ज “विभाजन विभीषिका स्मृति” दिवस मनाया जा’रदा ऐ। इस मौके पर मुल्ख 47 दी बंड दरान अपनी जान मुहाने आहले ते बड़ी मती पीड़ झल्लने आले सबनें लोकें गी श्रद्धांजलि देआ करदा ऐ। राश्ट्री राजधानी सने मुल्ख भरै च अज्ज केई कार्यक्रमें दा सरिस्ता कीता जा’रदा ऐ। एह ध्याड़ा असेंगी समाज च बंडु पुआने आले ज़ैहर गी खत्म करने ते इक-जुटता ते समाजी सदभाव गी बढ़ावा देने दा चेत्ता दोआंदा ऐ।

ध्यानजोग ऐ जे 47 आली बंड दरान जान मुहाने आलें ते विस्थापित होए दे लोकें दे सम्मान च केन्द्र सरकार नै बरे 2021 च 14 अगस्त गी “विभाजन विभीषिका स्मृति दिवस” दे तौर पर मनाने दा फैसला लैता हा। तोंआई उपराज्यपाल मनोज सिन्हा होरें बी मुल्ख दी बंड दरान जान मुहाने आहलें गी श्रद्धांजलि अर्पित कीती ऐ।

<><><><><><>

CM Internship Prog.

जम्मू-कश्मीर सरकार नै मुख्मन्त्री डिजिटल इंटरनशिप प्रोग्राम -2026 दे पैहले बैच गी हरी झंडी देई दिती ऐ। एह प्रोग्राम मकामी तकनीकी विद्यार्थियें लेई 6 महीने दी तनखाह आहली इंटरनशिप ऐ। जम्मू-कश्मीर दी e-governance एजेसी आसेआ चलाए जा’रदे इस प्रोग्राम कन्नै B.E., B.Tech, M.Tech, MCA ते M.Sc दे विद्यार्थियें गी कम्प्यूटर विज्ञान जां सूचना प्रौद्योगिकी दे खेत्तर च सरकारी तकनीक, साइबर सुरक्षा ते डिजिटल सेवाएं दा असल तुजुर्बा हासल होग। चुने गेदे विद्यार्थियें गी हर महीने 10 ज्हार रपे दा वजीफा ते माहिरें थमां मार्गदर्शन थहोग। उनें’गी मुख्मन्त्री हुंदे आसेआ दस्तख्त कीते गेदे प्रमाण-पत्र बी हासल होगन ते शीर्ष परियोजनाएं पर बी सर्वश्रेष्ठ प्रशिक्षु पैहल पुरस्कार लेई विचार कीता जाई सकदा ।

<><><><><><>

Absconding Terrorists Arrested

जम्मू च रेलवे पुलस (GRP) ने इक इऐ ने आतंकवादी गी गिरफ्तार कीता ऐ जेहड़ा पिछले 35एं बरें थमां फरार हा। अनंतनाग दे मरहामा-बिजबेहारा दा बसनीक आरोपी अल्ताफ हुसैन शेख भूमिगत होई गेदा हा ते मगरा अपनी पंछान गुप्त रखियै रवा करदा हा। ओह अपने होर दुए साथियें कन्नै 2 अप्रैल 1991 गी जम्मू रेलवे स्टेशन दे प्लेटफार्म नम्बर इक पर होए दे इक बम्ब धमाके दे मामले च शामिल हा- जेहदे च नीम फौजी बलें दे दंऊ जोआनें सनें त्रै लोक मारे गे हे ते 18 होर जखमी होई गे हे। लम्मे चिरे तगर कीती गेदी तपाशी मगरा पुलस ने आखरकार इस आतंकी हमले च शामिल- अल्ताफ गी फगड़ी लैता ते उसी अगों दी कनूनी कारवाई लेई जंदे रोज TADA अदालत च पेश कीता।

<><><><><><>

Shri Buddha Amarnath Yatra

जम्मू दे डिवीजनल कमिशनर रमेश कुमार ते जम्मू ज़ोन दे IGP भीम सेन टूटी होरें 17 अगस्त थमां शुर होआ'रदी "श्री बुड्ढा अमरनाथ जी यात्रा -2026" गी सुचारु ते सुरक्षित बनाने दे इंतजामें दा जायजा लैता। उ'नें सुरक्षा- ट्रैफिक नियमें- सिडकें दे रख-रखाव- जरूरी सेवाएं ते श्रद्धालुएं लेई स्थूलतें बारे गल्लबात कीती। उ'नें अधिकारियें गी आखेआ जे ओह इस गल्लै गी यकीनी बनान जे यात्रा शुरु होने शा पैहले सब्बनें जरूरी चीजें दा खरी चाल्ली रमानदारी कन्नै इंतजाम करी लैन। रस्तें च लोड़चदी मैडिकल स्थूलतां- एम्बुलेंस ते एमरजेंसी सेवां उपलब्ध करोआने पर बी जोर दिता गेआ। ट्रैफिक ते सुरक्षा टीमां मंजूर कार्यक्रम मताबक गड्डियें दी आओ-जाई दा प्रबंधन करगंन। ट्रैफिक इंतजामें बारे दस्सदे होई SSP Traffic Rural फारुक कैसर होरें आखेआ.....

<><><><><><>

Rainfall Pattern

मौसम विभाग नै जम्मू-कश्मीर च जंदी पैहली जून थमां 13 अगस्त 2026 तगर दी अवधि दरान सामान्य कोला मती बरखा बरने दी जानकारी दिती ऐ। जम्मू खित्ते च जित्थे सामान्य कोला 12 फीसद मती बरखा बरी ऐ उत्थें गै घाटी च सामान्य थमां 17 फीसद मती बरखा दर्ज कीती गेई। ऊआं शोपियां जिले च 48 फीसद घट्ट जिसले के किश्तवाड़ जिले च 43 फीसद घट्ट बरखा बरी ऐ। केई सारे जिलें च बरखा बरने दा आंकड़ा सामान्य कोला बड़ा मता रेहा ऐ- जिसलै के किश जिले च एह सामान्य गै दर्ज कीता गेआ ऐ। ऊआं कुल लाई-पाइयै जेगर बरखा बरने दे आंकड़े गी दिक्खेआ जा तां किश जिलें गी छोड़ियै पूरे जम्मू-कश्मीर च सामान्य कोला मती बरखा दर्ज कीती गेई ऐ।

<><><><><><>

Weather Update

जम्मू-कश्मीर दे मते सारे हिस्सें च जंदी रातीं हौली थमां दरमेयाने दर्जे दी बरखा दर्ज कीती गेई ऐ। मौसम विभाग नै प्रदेश दिएं मती सारी थाहें पर अगले इक हफ्ते दरान हौली थमां दरम्याने दर्जे दी बरखा बरने ते गरज-चमक सने किश थाहरें पर बड़ी तेज बरखा बरने दे बी असार दस्से न। विभाग नै अज्ज ते कल बी किश थाहरें पर खास करियै बडुलै सवेला ते चिरें दपैहरी जां सं'झा'लै हौली थमां दरम्याने दर्जे दी बरखा बरने ते गरज-चमक दी भविक्खवाणी कीती ऐ। एहदे परेंत 16 थमां 19 अगस्त धोड़ी जम्मू संभाग दे किश जिलें दिएं मती सारी थाहें पर इयै नेया गै मौसम बने दा रेई सकदा ऐ। इस बारे होर जानकारी देआ रदे न मौसम विभाग दे डायरेक्टर मुख्तार अहमद.....

<><><><><><>